



Naalackersuisut Juli 2022 naatinagu nunatta kangiani innuttaasunut inuussutissarsiornikkut inerisaanermut ineriartortitsinermullu paasisitsiniaanissamik pikkorissaanertaqartumillu pilersaarusiamik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

(Siullermeerneqarnera)

Inatsisartunut ilaasortamut Lars Poulsenimut qujanaq siunnersuuteqarneranut, aallaavimmigut nuannersumik liberaliusumut. Siunnersuuteqartoq assut isumaqatigaara, eqqarsartariaaseq qimassagipput, tassalu pisortat suna tamaat isumagissagaat. Pisortat taamaaliorinnaanngillat taamaaliussanatillu. Akerlianik namminerisamik iliuuseqartariaqarpugut, nutaaliortitsineruneq pinngorartitsinerunerlu. Ileqqunngortillugulu anguniagassanngortittariaqarparput, inuit namminneq imminnut napatinnissaat.

Qularutissaanngilaq, Tunumi isumaginninnikkut ajornartorsiutit annertuumik ukkatarineqarsimanerat. Sissuissavarpulli, ukkatarinninnerup taassuma, ilaqutariit ingerlalluartut, tunullinnguutissanngimmassuk. Tamanna tunngavigalugu Inatsisartunut ilaasortap Lars Poulsenip eqqortumik takusimavaa, inuussutissarsiornernerup ineriartortinneqarnissaata ukkatarinissaa eqqaamassagipput. Demokraatit tungaanniit qularutiginnigullinnarparput, suliffinnik pilersitsineq inuussutissarsiornerrullu ineriartortinnissaa, isumaginninnikkut ajornartorsiutinut pinaveersaartitsinitsinni sakkussaasoq eqqortoq. Inunnut tamanut pingaartuuvoq pisariaqartinneqarneq kiisalu ullaakkut iterunik pisassaqaarnissaat.

Tunumi inuussutissarsiornernerup siuarsarnissaanut periarfissaqarluarpoq – minnerunngitsumik takornariaqarnikkut, Islandimut qanninneruneq ullumikkumiit atorluarneqarnerusariaqarluni. Takornariaqanerlu tassaavoq siunissami paasisitsiniaanermi ukkatarissallugu pitsassuusussa. Taamatut oqareerluta, eqqaamassavarpup, takornarissat iliuuseqanngikkutta takkunnaviannigimmata. Taamaattumik pingaaruteqarluinnarpoq, Tasiilami mittarfiliornissaq. Tamanna Demokraatinit ukiorpassuarni anguniagaavoq, Assartuussineq pillugu isumalioqatigiissitap isumaliuutissiissutaanut innersuussisarput, tassanimi avaqqunneqarsinnaanngitsumik allaqqammat, inuiaqatigiinnut aningaasaqarniarnikkut iluanaarutaassasoq Tasiilami mittarfiliortoqarpat.

Tassunga atatillugu Naalackersuisut apererusuppakka, pilersaarutit suliniutillu sumut killissimanersut?

Isumaqarpunga pingaartuusooq, Namminersorlutik Oqartussat kisermaassillutik, paasisitsiniaanissap ingerlanneqarnissaa aningaasalersornissaalu isumagissanngikkat. Kommuneqarfik Sermersooq suliassamut peqataasariaqarpoq, kommunip Tunumi ineriartortitsisoqarnissaa soqutigisarisaqarmagu.

Paasinnilluta siunnersuut Inuussutissarsiornermut- aamma Aatsitassanut ataatsimiititaliami suliarineqarnissaa innersuussutigaarput.